

ESTER

Jawen unanmati janchaki

Israelin enabu ichapa Nabucodonosorin jatu iyuni mae betsa betsapa anu pakubainaibu Israelin enabu ana kushipai taekubainaibun jatuki sinatakin juni ichapabun jatu tenankin yamawakatsis inibukiaki. Janua Israel anua ainbu betsa Ester nawa betsa Persia xanen ibujaidatun ain ikunkaini jawenabu jau tenankin yamawayamanunbun tenantidubu dateama jawen bene jawenabu jatu yukaxunikiaki. Xanen ibujaida Asueron yunukinan, año 486 taewatan año 465 Cristo judiamatian jenenikiaki. Jaska Diosun Israelin enabu mekenikidi na miyuiwen nun tapintidubuki.

Besi ewapa watan xanen ibujaida Asueron jatu pimakubainikiaki, na janchadan

1 ¹⁻² Ja baditian maewan mishki kenebaunibu kushipajaida jawen kena Susa anu jiwexun ja mai pakea tibi badi juaikidi India anu paketani badi kaikidi inun surkidi Etiopía anu depia ja dasibi 127 provincia achi keyua dasibi xanen ibujaida Asueron jatu yunukubaini jaska wakin jatu dasibi mekekubainikidi matu yuikin unanmanun ea ninkakanwen.

³⁻⁴ Ma 3 año Asuero xanen ibukunkainkin jawen mabu midima jawendua inun, jawen jiwe betsa betsapa ichapa anu jawen mae jemaintin anu miban jua jawenduaya inun, jaska dasibibu yunukubainai jawen kushipa ewakainai jatu uinmakatsis ikin jabe dayamisbu inun, xanen ibubu bexmasbu inun, Persia nawa inun Media nawa detenamenikabu xanen ibubu inun, provincia tibi anua yununikabu inun, yununikabu bexmasbu jau benunbun jatu chanima Susa anu bei ichai keyushinabun jatu duawakin jatu besimakin 180 xaba xanen ibujaida Asueron jatu pimakubainkin ⁵ jatu keyumatan chipu jawen jiwe betsa betsapa jawendua jemaintin anu miban juaya jawendua anu ana besi betsa wakin jawen mae Susa anu jiweabu dasibi yununika xanen ibubu inun xanen ibuma jatu chanima bei ichabu 7 xaba jatu pimakatsi pewanikiaki, eska wakinan.

⁶Xanen ibun jiwe jemaintin betsa betsapa anu dau wakin jawendua wakin mankan juxupa chibu tibi anu mane juxupa plata meichikitiya jaki nexatan dispi nanke tashi midin jaki dispi meichikiti jaki kawenbainxun tadi pepa juxupa inun nanketapa puntebainabu mankan juxupa inun meshupa datsa pewanibu inun pau jawen naxpa yenkenjaida jemaintin tibi anu kekubainkin keyutan janu juindukuin oro maneki dakai baxti ika juindakunti inun plata maneki dakai baxti ika juindakuntidi jemaintin tibi anu tsaunbaunshinabu ⁷bei ichabu jawen jatu amati oro kenchawanibu betsa tibiki uva vino nuxuti xanen ibu yaushiyama jamen iki chakai jatu inanbaunkin jatu amakinan, ⁸jakia jawen jiwe anua piti inun nuxuti jabun inanbaunmisbu jawen tsumabu yuikin: “Jabun akaibu inun akabuma ninkamas jatu inanyamakanwen”, akin jaska Asueron jatu yunushina jatu amakubainaibun ⁹jawen benen jatu jaska waitian xanen ibujaida Asueron jiwe betsa anuxun jawen ain kayabi Vastin ja jatun bene beshianbun ainbuaibudi tadi jatube besikin pikubainaya

¹⁰⁻¹¹besikunkaini ⁷xabatian vino akubaini xanen ibujaida Asuero paean benimajaidakin jawen ain kayabi Vasti chanima jawendua xanen ibu bexmasbu inun juni dasibibu jawen ain jawendujaida jukin jau jatu uinmanun jawen ain kayabi Vasti xanen ibun maiti sawemabidankin jau janu tsauabu anu iwexununbun Mehumán inun, Biztá inun, Harboná inun, Bigtá inun, Abagtá inun, Zetar inun, Carcás, ⁷juni jubu binibu xanen ibu dayaxunmisbu Asueron jatu yunua ¹²Vasti anu buxun jaska jawen benen yunuxu yuiabu jakia xanen ibun yunuti jancha ikatsi ikama jatu danankin jawen ain kayabi Vastin jatu jawa ninkamaken chintunbidan Vastin jancha yuiabu ninkatan xanen ibujaida Asuero sinatajaidai min jaki kematiduma dakaxun ¹³jaska jatun beyawen taea jatun jancha ja chibanti yunuti jancha inun, nemati jancha ja unanepabu jabu pepabun unanjaidaubube jaska jawen ainin kanexuken jabun yunuti unanjaidaubube janchanun, iwanan, jatu ichawa ¹⁴unanepa betsabube ja xanen ibujaida jatube janchanamemisbu Asueron janu jatube tsauxun yunumis anu xanen ibujaida medabewai yununika bexmasbun Asueron jawa watidu yuimisbu jatu ichawa jabudan, juni unanepabu Persia nawabu inun Media nawabu ⁷xanen ibu kayabibu Carsená inun, Setar inun, Admata inun, Tarsis inun, Meres inun, Marsená inun, Memucán bea maniabun ¹⁵xanen ibujaida Asueron jatu yukakin:

—En jancha ea yuixunikabu en yunuti jancha buxun en ain kayabi Vasti yuibiabu ea jawa ninkama ea dananxuwen taexun nukun yunuti jancha inun nukun nemati jancha chibankin ¿tsuan jaskada man ea shinanxuntidumen?— jatu wa ¹⁶unanepabu betsabube nixun Memucánen xanen ibujaida Asuero kemakin yuikin:

—Min ain Vastin mia besti danankin bedabinwanmaki. Mia inun, yununikabu inun, janu provincia tibi min yunumis anu jiweabudi min ain

kayabitun jatube bedabinwankin mia dakewaxuki. ¹⁷Jaska min ainen axu ainbu dasibibun ninkakin unanxun yuikin: “Jawen ain kayabi Vasti jau junun Asueron jatu yunua buxun yuibiabu jawen benen jancha danain jawa kama ishiankiaki”, ikubainaibuwen taexun ainbu dasibibun jakidi ninkakubainxankanikiki. ¹⁸Ja dikabi Persia nawabu inun Media nawabu xanen ibubun jatun ainbuaibun jaska Vasti ixu tapinkin unantan jatun benen jancha ninkama chakabuwakin jatu akabu bechipaiama jatun bene tibi sinatakubainxankanikiki. ¹⁹Jaskawen taexun yuikin: “Min ain kayabi Vasti udenkin min nichian ana mia bebun jupaketidumaki. Jaska watan jawen xantukun ainbu betsa ja binua katutan min ain kayabi min watiduki”, akin jaska min bechipai ai mian shinankin min ana yunu bena watiduki. Min jaska yunuaya jau maewakin betsa taskawayamaxanunbun Persia nawabu inun Media nawabun nemati jancha nukun una anu jau kenenunbun min jatu yunutiduki. ²⁰Janu min yunubainai anu min xanen ibun jancha jau unanunbun jatu banabimakin keyuwe. Jaskawen taexun ainbu mabuyabu inun ainbu mabu jayabuma tibitun jatun benen janchawen datekin ninkakubainxankanikiki— aka

²¹Asuero inun unanepabu jabe janchanamemisbun Memucánen jancha ninkatan: “Peki”, ikaibun jaska jancha yuixu keska ja chibanbainti jau anunbun xanen ibujaida Asueron jatu yunua ²²janu Asueron yunubaunai anuxun jaska pe shinankin yuikin tsuabuda jatun jiwe anu jiweabu juni tibitun jaska bechipai ai bu jau yunukubainxanunbun jatu yunukin xukuabu tibitun jancha, jaska jatun jancha kenemisbuwen Asueron yunuti jancha jatu kenemaxuntan provincia tibi anu jawen xanen ibu bexmasbu jatu buma akeakenibukiaki.

**Jawen ain kayabi ana betsa binun, iwanan, xanen
ibujaidatun Ester katunikiaki, na janchadan**

2 ¹Chipu jatianda sinataima maintan jaska waima inun jaska jakidi kene chakabu wakin ichakawabiaima Asueron Vastikidi ana shinanyan ²jawen medabewanikabu xanen ibu bexmasbun Asuerokidi yuikin:
—Jawen ain kayabi bena nukun xanen ibujaida bixunkin chipash jawendua jawa chutanamedia ma nun jaska benaxunbauna peki. ³Chipash jawenduabu katuxun na maewan Susa anu ja ainbuaibun jiwe ewapa jawendua nukun xanen ibujaida jaya anu jau jatu iwenunbun provincia tibi janu yunumis anua juni pepabu Asueron jau jatu katununwen. Januxun jabun chipash jawenduabu katuxunimaxun ma jatu iweabun ainbuaibu mekenika Hegai jubu binibutun jau jatu mekekubainxanun nun yunutiduki. Jawen jawendua wati dauwen Hegain jatu pewakubainkin ⁴chipash jawendua betsabu binua bechipai jaidakin Vastin xantukun jawen ain kayabi wakin Asueron katutiduki— itan Asuero anu buxun jabias jancha yuiabu Asueron jatun shinan bechipaikin:

—Man ea jaska waxuntidubuki— jatu wa
⁵maewan Susa anu juni betsa Judío nawa jawen kena Mardoqueo jawen epan kena Jaír inun, jawen juchin kena Simí inun, jawen juchin epan kena Quis na dasibi Israelin juni bake Benjamínen xenipabu inibukiaki. ⁶Jerusalén anua Judán xanen ibu Jeconías inun jawenabu Babilonia anu xanen ibujaida Nabucodonosorin jatu iweaitian Mardoqueon xenipabu jatube bedianibukiaki.

⁷Mardoqueon jawen pui nantakeatun ainbu bake jawen ibubu ma mawanibu Mardoqueon jawen bake keska wakin yume waima chipash jawenduajaida jawen Judíon janchawen kenadan, Hadasábiaken Persia nawan janchawen kenakin: “Esterki”, akubainibukiaki.

⁸Maewan Susa anuxun xanen ibujaidatun jancha banabimakin keyuabu chipash jawenduabu katukin Esterdi jatube katuxun xanen ibujaidatun jiwe betsa betsapa mishki kenebaunibu anu chipashbu jatu iyuxun ainbuaibun jiwe anu jau jatu medabewakubainxanun ainbuaibu mekenika Hegai inankin chipashbu mekemabu ⁹Ester pepa jawendua besti ikunkainkin Hegai bechipaimakubainaiwen taexun jawen jawenduawati dau shadabuwen jawaida daunkin taewakin januxun piti pepasdi pimakubainkin ja dikabi jau Ester medabewakubainunbun ⁷dayadu ainbu pepabu xanen ibujaidatun jiwe anua katuxun jatu yunuxun ainbuaibun jiwe dintu pepa anu Ester inun jawen ⁷dayadubu jatu maewaxun Hegain jatu jiwemakubainaya

¹⁰jau xabakabi janchai: “En Judío nawaki”, ikin jau yuiyamaxanun Mardoqueon Ester yunushinawen taea jawenabu inun jawen ibubukidi Ester janchakin jawa yui taskamaken ¹¹janua jaska Ester pewakubainkanimenkain, ninkanun ika xaba tibi ainbuaibun jiwe jemaintin anu Mardoqueon jatu dainbainkin uintantanaya

¹²¹²uxe jawen jawendua wati dau chipash jawendua tibi jatu daunkubainkin ja dukun ⁶uxe jatun yuda tibi xeni jawen kena mirrawen jatu dapuxkubainkin keyuxun ana ⁶uxe jatun yuda tibi xeni ininipa inun xeni teipa jaska ainbu jawen imiswen ana jatu dapuxkubainkin ma keyuken chipash jawendua bestibu tibi xanen ibujaida Asuero bebun butan butankin ¹³ainbuaibun jiwe anua xanen ibujaida anu kakin jawadawen chipash tibi daukainkatsi ikin jawada jatu yuka jawa jatu nemama ikaibun ¹⁴xanen ibujaidatun jiwe anu ka meshu medan Asuero chutanametan penama butukaini ainbuaibun jiwe ewapa teke betsa anu chipash tibi iyutantankin Asuero ainbuaibu jawen ain kayabima mekenika Saasgaz jubu binibun jau jatu mekekubainxanun janu nichianbu chipu xanen ibujaida anu ana butidubuma jakia chipash betsawen Asuero benimakin jawen kenawen ana jatu kena chipashbu ana butidubu ipaunibukiaki.

¹⁵Mardoqueon epa betsa Abihailin ainbu bake Ester jau jadi Asuero anu katanun jawen medabewanikabun Ester pewakubainaiun Esterin

dasibibu jatu pe shinanmakubainaiwen taexun ainbuaibu bebunkidi jaska iki kai jatun mekenika Hegain yunua besti Ester jabe iki kaya ¹⁶Asuero xanen ibui 7 año kai 10 uxe jawen kena Tébet keyudiamatian xanen ibujaida Asuero anu jau jawen yuda uinmai kanun jabun Ester iyubu ¹⁷Ester jawendua Asueron uinkin chutaxu jaska ainbuaibu jatidi bechipaibiakubainkin jatu binumakin Ester bechipajaidaya chipash jawenduabun Asuero benimawakubainimabu jatu binukin Esterin Asuero benimajaidawa xanenibun oro maiti sawemaxun Vastin xantukun Ester katukin jawen ain kayabi wanikiaki. ¹⁸Chipu jadatuda uxe anu jau Ester kenwankubainxanunbun jabun medabewai dayaxunmisbu inun jabe yununikabu xanen ibubu bexmasbu Asueron jatu chanima beabu jatu besimakin Asueron jatu pimakubainkin uxe tibi provincia xanen ibubu tibibun Susa anu ja pei pakamisbu ana ichapa jatu pakamama jatu eskadabes waxunyua pakayukubainaibun januxun xanen ibu pepakin jawa yaushiana tsuabuda jawada jamen inankuinkatsis ikin inankuinti ichapa Asueron jatu paxkaxunbaunikiaki.

**Xanen ibujaida Asuero detenun ika yubakaibu
Mardoqueon june tapinmanikiaki, na janchadan**

¹⁹Ainbuaibun jiwe jawendua betsa anu chipash jawenduabu iyutantanaibutian xanen ibujaidatun jiwe mishki kenebaunibu jikiti xui beputi anu Mardoqueo tsauken ²⁰Ester katudiana Mardoqueobe jiwexun jawen jancha ninkakubaini Mardoqueon yusinkubainima chibain jawenabukidi inun jawen ibubukidi Esterin jawa yuidiamaken ²¹xanen ibujaidatun jiwe jikiti betsa betsapa mekekubainmisbu detenamenika yununika dabe Bigtán inun Teres Asuero ki sinatajaidakin detenun ika yubakaibu xanen ibujaidatun jiwe jemaintin jikiti xui dapi Mardoqueo tsauxun jatun yubakati jancha june ninkakin ²²tapintan jaska wakin detekatsis ikaibukidi Mardoqueon Ester yuia jawen bene Asuero anu kaxun jabun detenun ika yubakaibu Mardoqueon ninkaxu Esterin banabima ²³ninkatan jawen xanen ibu bexmasbun: “¿Jaska chanimamenkain?” ikain jau ninka pewanunbun Asueron jatu yunua buxun kushipawen yuka ibaunkin: “Chanimaki”, iwanan, tapinxun Asuero yuiabu detenamenika yununika dabe Bigtán inun Teres jabia dabe tenexxun jau duntanunbun jatu yunua jawen jancha ninkakin jawa kaneama axuanbu xanen ibujaidatun uianyan jaska xanenibun akubainmis una anu jau jawenabun jatukidi tapinkubainxanunbun ja juni dabe inun jaska Mardoqueon medabewashinakidi jawen kenexunikatun jatu kenexunikiaki.

Mardoqueo inun Amán eskanibukiaki, na janchadan

3 ¹Uxe betsatian Agagin enabu Hamedatan juni bake Asueron Amán xanen ibu bexmasbiaken ana jawen xanen ibu xekakin katukin

xanen ibujaida medabewai yununikabu dasibi janu yunubaunai anu jatun xanen ibu waxun ²Amán juaya xanen ibujaidatun jiwe ewapa anu dayamisbu danti itan tininxun jau kenwankubainxanunbun xanen ibujaidatun jatu yunushinawen taexun jawenabun jaska wabiakubainaya jakia Amán juaya Mardoqueon kenwain jaki dateama jawa ja bebun jaki danti iki tinianma ikunkainaya

³januxun xanen ibujaida dayaxunmisbun Mardoqueo yukakin: “Amán kenwanma ¿jaskakin xanen ibujaidatun jancha chibankin min ixuanmamen?” ikin ⁴xaba tibi jabias yukakubainabu jakia Mardoqueo jatu ninkama ikunkainaiwen taexun Mardoqueo jabun yunumis jaskai ikunkainai tapintan jawen shinan betsa wamanun ika Amán anu buxun yuikin: “Judío nawa Mardoqueo mia kenwain danti ikamaki”, akabu ⁵ninkatan shinankin: “Chanima en dainbaina eki danti iki Mardoqueo tininxun ea kenwainsmaki”, iki Amán sinatajaidakin: ⁶“Mardoqueo Judío nawakiaki”, iwanan, ma yuiabuwen taexun Mardoqueo besti kupikatsi ikama jakia janu Asueron jatu yunubaunmis anu jiweabu Judío nawabu dasibi tenankin jatu keyuxanun, iwanan, Amánen jatukidi shinankin taewaya

Judío nawabu dasibi jau yamawaxanunbun Amánen jatu yununikiaki, na janchadan

⁷Asuero xanen ibukunkaini ma 12 año taekainaya ja dukun uxe jawen kena Nisán anuxun Amánen mukayabu ichawaxun Judío nawabu dete keyukin jau jatu yamawaxanunbun jadatuda uxe inun xaba jadatuda atidubu unanun, iwanan, mukayabun jawen jamapai unanti xau mexte númeroya dabe jau putanunbun jatu yunua jawen unanti putabu uxe 12 jawen kena Adar jawen xaba 13 jatu unanti wamai taxnia uintan katuabuwen taexun ⁸Asuero anu kai jikixun Amánen yuikin:

—Provincia tibi janu min jatu yunukubainai anu jiweabube jusia yuda xuku betsa jiwekubainmisbu jatun beya betsabun beya keskama ja dikabi jaska min yunua ninkakin aisbumaki. Janu min yunumis anu jiwekubainaiibu minadan, jaska pemaki. ⁹Jaskawen taexun jau jatu yamawaxanunbun mian jaska pe min shinainan, yunukin provincia tibi anu min jatu banabima keyubauntiduki. Min jaska yunuaya janu min mabu inun min pei mekemisbu jiwe anu 330,000 kilo mane plata jas buxun en jatu mia adumaxunxanaii, inankuinkinan— aka

¹⁰jaska wa ninkatan jawen meichikiti kena neya metsekexun Judío nawabuki sinatai Amán inankin ¹¹yuikin:

—Peki. Mane plata min ea inanun ika ikaidan, en biamaki. Minaki. Jakia ja nawa betsa xukuabukidi min ea yuixu jaska min jatu akatsis ikai keska axanwen— aka

¹²kainkain ja jabias xabatian uxe ja dukun Nisán xaba 13tian xanen ibujaidatun kenexunika ichapa kenakin Amánen jatu ichawaxun maewan

yununika tibi inun, provincia yununika tibi inun, yuda xukuabu xanen ibubu tibi jawen yunuti jancha jau jatu kenenunbun Amánen jatu yunua provincia tibi inun, yuda xukuabu tibitun jancha inun, jaska kenemisbuwen Amánen yunuti jancha keneabu xanen ibujaida Asuero jawen kena kenexunkin xanen ibujaidatun meichikiti kenayawen kene tibi Amánen netankin tsaminpakekin keyutan ¹³janu Asuero yunuai anu jiweabu tibi anu kene bunikabu yunuti jancha bumakeakekin uxe 12 jawen kena Adar xaba 13tian janu Judío nawabu bedunanbu inun, chipashbu inun, anibu inun, yuxabu inun, bake mishtinbu inun, ainbuaibu dasibi jabias xabatian jatu detekin yamawatan jatun mabu shadabu jayabu jau bixanunbun Amánen jatu yununikiaki.

¹⁴⁻¹⁵Xanen ibujaidatun jatu yunuawen taea kene bunikabu jawaida kainbaini buxun yununika tibi inun xanen ibubu tibi jawen yunuti jancha jatu inanbaunabu ja xabatian Judíobu dasibi detekatsi jau pewanunbun provincia tibi anu inun yuda xukuabu dasibi tibi anu jatu banabimakin keyutan januxun janubi xanen ibujaidatun mae ewapa Susa anu jabias yunuti jancha jatu banabimadiabaunabu, yuda ichapa jaskatima itimaskabaunaibun jakia unanuma xanen ibujaida Asuero inun Amánen uva vino akaibun,

**Amánen yunuti jancha ninkatan Judío nawabu punu
nukatan kaxakubainibukiaki, na janchadan**

4 ¹jaska dasibi Amánen ashian Mardoqueon ninkatan juinti nishmai keyuxun jatu uinmakin jawen tadi ushni ushni akin putatan jawen nui bika tenei unanmati tadi bexa sawetan chi mapu bitan jawen buxka anu mapu tukutan maewan Susa namakis anu kai taekaini nuijaidai kaxai in in ikunkaini ²xanen ibujaidatun jiwe jemaintin kenebaunibu jikiti xuiki kematan tsuada tadi bexa sawea jikitidumawen taexun Mardoqueo jau jikiyamanun mekenikabun nemabu ³ja dikabi provincia tibi anu xanen ibujaidatun jancha buabu jau Judío nawabu dete keyuxananunbun jatu banabimaibu Judío nawabun ninkatan datei juinti nishmajaidai samakei kaxa chakayamakin jatun beya chibankin midimabun jawen nui bika tenei unanmati tadi bexa sawe keyutan chi mapu mamaki dakayukubainaibun

**Kaka chakabu ninkatan Esterin jawenabu
medabewanikiaki, na janchadan**

⁴Esterin dayadu ainbuaibu inun jawen mekenikabu jubu mextenibun jaskabaunaibu tapintan Ester anu buxun banabimakin yuiabu Ester Mardoqueowen nuijaidakin jau tadi bexa pekatan tadi betsa sawenun Mardoqueo anu tadi pepa jau buxuntanunbun bumakin yunua buxuanbu jakia Mardoqueon jawa jatu mebinkatsi ikama dananxunwen taexun

⁵juni jubu binibu Ester dayaxunkunkainmis jawen kena Hatac Esterin kena jua Mardoqueo jaskai ikai jau uinkin yukatanun Esterin yunua ⁶xanen ibujaidatun jiwe jemaintin jikiti xui bebun maewan kushipa Susa namakis janu icha janchanamemisbu xaba ewapa anu Hatac kai Mardoqueoiki nukuxun jaska Esterin yunuxu keska jabe janchakin yuka: ⁷“Eskawen taea en ikaii. Asueron jaska jatu yunubaunshina inun Amánen jati jawen mane plata pei mekenikabu jatu inantan jawen taexun Judío nawabu dasibibu jau jatu tenankin yamawaxanunbun xanen ibujaida yubashinakiaki. ⁸Jaska bestima eskadi en jayaki. Na jaska jatu yunushinabu inun Susa anu yunukin jatu banabimabaunshinabu naki. Na Ester ea inanxuntanwen”, iwanan, inankin dasibi yuitan januxun Mardoqueon Hatac yuikin: “Jamen betsadan, ibubis jawen bene Asuero anu jabi kaxun jabe janchakin ja xanen ibujaidatun nukunabu jau nuku medabewamanun Ester ea yuixunditanwen”, aka

⁹Hatac chintunkain jaska Mardoqueon yuixu Ester yui keyua ¹⁰⁻¹¹Esterin kemakin Hatac yuikin: “Xanen ibujaidatun jatu kenama juni kasmai ainbun xanen ibujaida uinun ika jemaintin uke medan janu Asuero tsaumis anu ibubis jikiaibu jawen yunuti jancha jayaki, jawen taexun jatu detetidan. Janu Asueron jatu yunubaunai provincia tibi anu jiweabu inun xanen ibujaida dayaxunmisbu ja yunutikidi jabun unankanikiki. Jakia ja juni kenamabia jawen nuikin jawen xanen ibu unanti mane oro mestenti jaki Asueron sananbainaya jiwetiduki, jawa mekenikabun deteamadan. Jamen eadan, ma 30 xaba kaya ea kenamawen taea en jadi kai en jawen dateaii”, iwanan, “Na jabias jancha Mardoqueo ea ana yuixuntanwen”, akin ana Hatac yunua

¹²⁻¹⁴Mardoqueo anu Hatac ana kaxun Esterin jancha yuiyai ninkatan ana jau yuixuntanun ja juni yuimakin: “Nukunabu Judíobu dasibi tenanbaunxanaibu xanen ibujaidatun jiwe anu min june jiwea mia besti mekekin tenanma ixankanikiki. Jaska shinanwen. Natian min bene min jawa yuiama inun, nukukidi janchakin min nemamakenan, janiada mae betsa anua Judío nawabu medabewanun ika nawa betsa bexankanikiki. Jakia mia inun min epan enabu nun mawai keyuxanaii. Jaskawen taea min nuku medabewaxanun jawen ain kayabi mia wamakin Asuero mia katumaimabumenkain. Jaska en mia yunuxu janchatanwen, jawa deteamadan”, iwanan, “Na jabias jancha Ester ea ana yuixuntanwen”, akin Mardoqueon Hatac yunua

¹⁵Ester anu Hatac ana kaxun Mardoqueon jancha yuia ninkatan Esterin ana jawen jancha yunukin: ¹⁶“Jau ea samakexununbun kaxun nukunabu Judíobu Susa anu jiweabu jatu ichawatanwen. Xaba dabe inun besti inun meshu dabe inun bestidi jawa piama jawa nuxuama samakeaibun en dayadu ainbuaibu inun eadi nun jabiaskadiaidan. Samakei jenetan xanen ibujaidabe matu janchaxuni en kaxanaii. Jawen nemati jancha

pemabiaken, ea detekatsis ikin jau ea jatu detemaxanunwen. Mawaki en dateamaki”, iwanan, “Na jabias jancha Mardoqueo ea yuixuntanwen”, akin ana Hatac yunua ¹⁷Mardoqueo anu Hatac ana kaxun Esterin jancha yuia ninkatan jaska Esterin yunuxu keska Mardoqueon jawenabu jatu ichawatan yunua dasibi samakexunibukiaki.

Xanen ibujaida bebun Ester kanikiaki, na janchadan

5 ¹Xaba dabe inun besti binutan jawen xanen ibu tadi jawendua Esterin sawetan xanen ibujaidatun jiwe anu kai jemaintin kenekauna uke medan jikikain ja xanen ibujaida Asuero jawen tsauti anu tsaua ja dintu jikiti xui bepean anu Ester kakain nixun manaya ²jemaintin anu jawen ain kayabi bechitan jaska bechipai ai uinmakin jawen xanen ibu unanti mane oro mestenti tsumabainmis Asueron jakidi sanan Ester tapikain jaki kemaxun jawen mane oro mestenti debu mekin detsuanyan ³januxun jawen ain kayabi Asueron yukakin:

—Esteriin, ¿min jaskada juamen? ¿Min jawa bechipai juamen? En xanenibun yunumis namakis paxkatan kasmai jawada min ea yukai en mia ja inantiduki— aka

Esterin kemakin yuikin:

⁴—Mia ja pimakin kenwankatsi piti inun nuxuti pepa ma en pewabidanaii. Natian ebetan pikatsis ikinan, Amándi min iyutiduki— atan taxnikainaya

januxun jawen dayadubu Asueron yunukin:

⁵⁻⁶—Jaska Esterin ea yubaxu jau ebetan pi kanun Amán jawaida benatankanwen— jatu wa

buxun Amán itanabu jawen ain kayabi Esterin ma piti pewaxuna anu Asuero inun Amán bui jikixun

piabun xanen ibujaida Asueron Ester yuikin:

—Jawada min ea yukakatsis ikai ea yukawe. En xanenibun yunumis namakis paxkatan kasmai jawada min ea yukai en mia ja inantiduki— aka

⁷Esterin kemakin yuikin:

—Ean eska besti shinankin en mia yukaii. ⁸Ea bechipaikin ea uinmakin axunkinan, jawada en mia yukai min ea axunxanimenkain. Mia kenwankin piti en ma pewa meshukidi ebetan pi mia inun Amán man ana jutiduki. Jabiatandi jaska min ea yukaxu en mia yuixanaii— aka pikin keyutan taxnibainaibun

Jakixun Mardoqueo tenexkatsi Amánen jatu pewamanikiaki, na janchadan

⁹pikin yaniwatan Amán benimai pepe kainaya dasibibu jaki danti iki tininkubainaibun jakia xanen ibujaidatun jiwe jemaintin jikiti xui

anu Mardoqueo tsaua jawa tukukauani beniama Amánen Mardoqueo jaskaxunai dainbainkin uinbaini jaki sinatajaidabiakin ¹⁰jaska sinatai Amánen tsua uinmama kai jawen jiwe anu jikitan jau jawen ain Zeres inun jawen jaibuaibu jatu kenatanunbun jawen tsumabu yunua ¹¹buxun jatu yuiabu dasibi bei jaki nukui ichaibun ibubis kenkin jatu yuikin:

—Mabu inun pei midima en jayaki. En bakebu ichapabudi en jayaki. Xanen ibujaida medabewanikabu inun jawen xanen ibubu bexmasbu ea jatu binumakin en jabetan yunukubainxanun xanen ibujaida Asueron ea katuima ea besti en pejaidaki— itan ¹²ana kenkin jatu yuikin:

—Ja dikabi kenwankin piti inun nuxuti pepa xanen ibujaida Asuero amakin en jabetan pinun jawen ain kayabi Esterin ea besti kenaxun pimaxuki. Jakia jaska bestima meshukidi nuku pimakatsis ikin ea ana yubaxuki. ¹³Jakia xanen ibujaidatun jiwe jemaintin kenekauna jikiti xui anu ja Judfo nawa Mardoqueo tsaua en uintantanaidan, ja dasibi jaska shadabu pepakidi en matu yuiaidan, enadan, jawamajaidaki— jatu wa ¹⁴ninkatan jawen ain inun jawen jaibuaibu dasibibun yuikin:

—Jakixun tenexti ji keyatapa 22 metro jau anunbun ikis jatu yunuwe. Ma jaska wakin mia keyuxunabu meshukidi penama Mardoqueo min jakixun tenextidu xanen ibujaida yukaxanwen. Mia bechipaikin jawada min yuka mia amaxanikiki. Mardoqueo ma jatu tenexmatan ana jawa shinain bika teneama xanen ibujaidabetan pi min katiduki— akabu jaska shinankin yuiaibuwen taexun Amán benimajaidakin jawen tenexti keyatapa jau anunbun jatu yunuken

Mardoqueon Amán binunikiaki, na janchadan

6 ¹jabias meshu medan xanen ibujaida Asuero jaskatan uxatidumawen taexun jaska xanen ibubun akubainmisbu miyui unaki kenekubainmisbu bitanxun jui kushipawen jau yuixununbun jatu yunua kaxun bitanxun miyui kene yui taewakin ²xanen ibujaida Asuero detenun ika xanen ibu mekenikabu yununika dabe Bigtán inun Teres yubakaibu jatun jancha Mardoqueon june ninkatan xanen ibujaida banabimaima ja jakidi keneimabu yuixunabu ³ninkatan xanen ibujaida Asueron jatu yukakin:

—Mardoqueon ea medabewakin mekeimawen taexunan, ¿jawa manakukin duawakin man inainmamen?— jatu wa jawen medabewanikabun kemakin yuikin:

—Tsuan nun jawa waxuanmajaida ikimaki— akabu

⁴januxun Mardoqueo tenexkatsi jau anunbun jatu yunushina anu tenextidu Asuero yukanun ika jawen jiwe jemaintin kenekauna anu Amán dama jikiaya Mardoqueo duawakatsis ikin Asueron jatu yukakin:

—En jiwe jemaintin anu ¿tsua juxun ea manaimenkain?— jatu wa

⁵uintani bexun jawen medabewanikabun banabimakin yuikin:

—Amánen mia manaikiki— akabu
jatu yunukin:

—Jau jikinun itankanwen— jatu wa

⁶buxun iwekin Amán bichiabu xanen ibujaidatun Amán yukakin:

—¿Tsuada xanen ibujaidatun bechipaikin duawayadan, jaska
waxuntidubumen? Jaska min shinain ea yuiwe— aka

Amánen jamebi shinankin: “Tsua xanen ibujaidatun duawakatsi
ikimenkain. En ea bestiki”, iwanan, ⁷kemakin yuikin:

—Ja juni duawakin ⁸xanenibun tadi min sawemis jau benunbunwen.
Min jaki katsaumekunkainmis caballo xanenibun oro maiti sawea jau
bedianunbunwen. ⁹Tsuada duawakin min kenwankatsis ikai min tadi
sawematan min caballoki jau katsaumenun min xanen ibubu bexmasbu
jadatuda pepa katuxun min tadi inun min caballo jau inanunbun
jatu yunuwe. Min tadi sawematan min caballoki katsauntan maewan
Susa namakis janu icha janchanamemisbu xaba ewapa anu caballo
dispi xewexekeawen iyubaunkin jui kushipawen: “Ja juni xanen
ibujaidatun bechipaikin duawaidan, naki”, akin jawenchains jabias jau
yuikubaununwen— aka

¹⁰ninkatan jawen jancha bechipaikin Asueron Amán yunukin:

—Jawaida kainkaini kaxun en tadi inun en caballo beabu jatu mebintan
Judío nawa Mardoqueo en jiwe jemaintin kenekauana jikiti xui anu ma
tsaua iyukin jabias min yuixu keska wakin ea duawaxuntanwen. Jaska
min ea yuixu keska ea axunkin jawa kane taskama akin keyuwe— aka

¹¹dakeyabi xanenibun tadi inun xanen ibujaidatun caballo jatu
mebinbain Mardoqueo anu kaxun tadi sawemaxun caballo katsauntan
maewan Susa namakis janu icha janchanamemisbu xaba ewapa anu
caballo dispi xewexekeawen iyubaunkin jui kushipawen yuikin: “Na juni
xanen ibujaidatun bechipaikin duawaidan, en eska waxunkubanaai”,
akin jawenchains yuiyatankin ana iweken

¹²maewan anu imabaunkin jatu uinmakin keyutan caballokia butea
xanen ibujaidatun jiwe jemaintin kenekauana jikiti xui anu Mardoqueo
chintunkain ana tsauaya Amán jawaida kaini punu nukajaidai dake pae
tenei tadiwen bepukua jawen jiwe anu kai jikitan ¹³dasibi jaska watanai
jawen ain inun jawen jaibuabu jatu yui keyua jaska jatu yuia ninkatan
jabun yuikin:

—Ja Mardoqueodan, Judío nawadukain. Xanen ibujaidatun Mardoqueo
bechipaiaiwen taexun min kushipa min ma benukin taewaxuki.
Mardoqueo min maematidumaki. Jakia min xanen ibu babutan dasibi
min benuxanaai— akaibun

¹⁴janchai menediabumaken jabiatandi xanen ibujaidatun dayadubu
bei jikixun piti pepa Esterin ma pewa anu jau jawaidakidanun Amán
yuitan iyubu,

**Amán jau tenexnunbun xanen ibujaidatun
jatu yununikiaki, na janchadan**

7 ¹Esterin ma jatu piti pewaxuna anu xanen ibujaida Asuero inun Amán buxun ²pikin ana ja kachu Asueron Ester jancha wakín: —Jawada min ea yukakatsis ikai menan jawaida ea yukadiwe. En xanen ibun yunumis namakis paxkatan kasmai jawada min ea yukai en mia inantiduki— aka

³kemakin Esterin yuikin:

—Min en xanen ibuki. Ewen benimakin jaska min ekidi pe shinain inun min ea bechipaiai eska en mia yuiái ea ninkawe. Ea inun enabu nuku detekin tenanxanun ika ma yubakashinabuki. Ea inun enabu nun mawayamaxanun jatu nuku nemaxunxanwen. ⁴Ea inun enabu yamawakin keyukatsis ikin pei mia inanun, ixun mia padanshinaki. Dayadu esclavobu nuku wakín peiwen nuku mia jatu inainmabunan, eanan, en mia yuiama ikeanaii, na nukuki sinataitun jaska bechipaiaiwén jawen xanen ibu nuku chakabuwamaidan— aka

⁵januxun Asueron yukakin:

—¿Tsuamen, jani ja jatun matukidi jaska shinankin yuima min ea yuiaidan?— aka

⁶kemakin Esterin yuikin:

—Chakabuwai nukuki sinatajaidakunkaini juni chakabudan, na jabia tsaua Amánki— akai

ninkatan xanen ibujaida inun jawen ain kayabi bebunua datejaidai Amán jawa tukuama baxti ika dakaken ⁷Asuero sinatajaidai benikaini januxun piái anua taxnikaini ainbuaibun jiwe jemaintin jua midima anu kaken janua: “Asueron ea tenankatsis ikai en unaiin”, ikin teke naxabakan anu Amán baxti ika dakaxun jau jawen bene nemaxunun jiwekatsis ikin Ester medabe ea akaya ⁸⁻⁹janua jemaintin jua midima anu iaketantani chintunkidan jiwe naxabakan Asuero jikikidankin janu baxti ixun piaibu anu Ester dakaken ja dapijaida Amán danti ika uinkin ana jaki sinatajaidakin jui kushipawen Asueron yuikin:

—Ana ea bebunua inun en jiwe anuxun en ain kayabi ¿min chutanun ika ikimenkain?— aka

jawen jancha ninkatan xanen ibu mekenika betsan tadi tuaxwen Amánen buxka bepua jaska waya ja xanen ibu mekenika betsa jawen kena Harbonán xanen ibujaida yuikin:

—Amánen jiwe jemaintin anu januxun tsuada tenextidubu keyatapa 22 metro jaska Amánen jatu yunua ashianbu niaki. Mia medabewakin mia detekatsis ikaibu Mardoqueon mia banabimaima Amánen januxun tenankatsi jatu amashinaki— akaya

januxun Asueron jatu yunukin:

—Peki. Jaskakenan, janu jaki Amán tenextankanwen— jatu wa
¹⁰Mardoqueo tenexnun ixun jatu yunua ashianbu anu Amán tenexabu
 jaska waibu unantan xanen ibujaida sinatajaidabiai maintan,

Yunuti bena Judío nawabu kenexunibukiaki, na janchadan

8 ¹Jabias xabatian Judío nawabu maemanun ika ishian Amánen jiwe
 inun jawen jamapai jaya mebintan xanen ibujaida Asueron Ester
 inanken Esterin Asuero yuikin: “Eska betsa mia yuinun ea ninkawe.
 Mardoqueodan, en epa betsan bakeki, ea jatun yumewani en nantakea
 puidan”, akaiwen taexun ²jau tenexnunbun Amán iyudiabuma Asueron
 jawen meichikiti mebinxun ibubis ana sawea xanen ibu wakin jawen
 meichikiti metsekexun Mardoqueo inan sawediaya jawada shadabu Amán
 jayakunkainshina jawen mabu mekexunika wakin Esterin Mardoqueo
 katutan ³jabiatiandi kaxai jawen beun jene titiki iki Asureon tae bebun
 dakaxun Judío nawabu dasibi jau tenanxanunbun jatube yubakakin
 chakabuwakin Amánen jatu yunuima jau ja chibankin ayamaxanunbun
 jau jatu nemakin bextexunxanun Esterin ea akin ana jancha wakin
 taewayaya ⁴jau jabe janchanun jawen xanenibun oro mestenti jaki sanan
 Ester benikaun nixun ⁵Asuero yuikin:

—Chanima kayabi ea bechipaikin min ewen benimaimenkain.
 Min nukun xanen ibuken jaska en mia yukai pemenkain. Jawada
 en mia ea akai pe shinankin Amánen yunuti jancha jatu bumaima
 nemakin jau ayamaxanunbun min ana kene bena wakin nuku jatu
 yunuxuntiduki, janu provincia tibi min yunumis anuxun Judío nawabu
 jau tenanyamaxanunbunan. ⁶Enabu Judíobu dasibi inun enabu kayabi
 jatu detekin chakabuwaibu uin datekin en jaska tenetidumaki— aka
⁷xanen ibujaida Asueron kemakin jawen ain kayabi Ester inun
 Mardoqueo yuikin:

—Judío nawabu dasibi jatu tenanmakatsis ikimawen taexun
 tenexkanxuki. Jamapai shadabu Amán jayakunkainshina en ma mia
 ibuwamaxuki. ⁸Nukun yunuti jancha xanen ibujaidatun kenaya en
 meichikiti keneyawen ma netanbu ja yunuti jancha tsuan nemakin betsa
 watidumaki. Amánen yunuti jancha eandi en nematidumaki. Jakia Judío
 nawabu medabewakin jadakidi man shinain jaska man bechipaiaikidi
 man nematiduki. Jakia en kenawen en xanen ibu bexmasbu jatu nemama
 man yunuaidan, jau jatu anu buxanunbun ana kene betsa watan en
 meichikiti en kenayawendi netanpaketan Judíobu medabewakin man jatu
 bumatiduki— jatu wa

⁹uxe 3tian jawen kena Siván xaba 23tian xanen ibujaidatun
 kenexunikabu jawaida Mardoqueon jatu kena bei ichaxun maewan
 badi juaikidia India anua taekidana 127 provincia badi kaikidi inun
 surkidi Etiopía anu depia janu Asueron jatu yunumis anu jiweabu Judío

nawabu xukuabu tibi inun, maewan yununikabu tibi inun, provincia yununikabu tibi inun, yuda xukuabu betsa betsapa xanen ibubu tibi jau jatu buxuntanunbun jabun jancha inun jaska kenemisbuwen Mardoqueon yunuti bena jatu kenemabu ¹⁰kene tibiki xanen ibujaidatun kena “Asuero” Mardoqueon kenexun xanen ibujaidatun meichikiti kenayawen netanpakekin keyuxun xanen ibujaidatun caballo midima anua kushibainmisbu katuabu ja caballoki katsaumbainkin kene tibi buxun jau jatu inanbauntanunbun Mardoqueon jatu yunua buabu ¹¹⁻¹²kene tibi anu eska xanen ibujaidatun Judío nawabu yunua jabias xaba Amánen katuima uxe ¹²tian jawen kena Adar inun xaba ¹³tian janu Asuero jatu yunumis provincia tibi anuxun jabias xaba bestichaitian jatun jiwea mekei jatu nemanun ika janida mae betsa betsapa jiwebaunabu anu Judío nawabu ichatidubuki. Tsuada yuda xukuabu inun jadatuda provincia anu jiweabun jatu detenun ika detetiya beaibu Judío nawabun jatu detekin tenankin jatun ainbuaibu inun jatun bakebu dasibibuwen jawa nuiama jatu yamawakin keyutan jatun jamapai shadabu jayashinabu mebinkin ibuwatidubuki. ¹³Jatuki sinataibu jatu kupinun, iwanan, Judío nawabun jau pewakubainxanunbun provincia tibi inun dasibi janu jiwebaunabu tibi jatu banabimakin keyubaunkin na yunuti jancha xanen ibujaidatun jancha keska yununikabun jau jatu unanmakubainxanunbunwen. ¹⁴Xanen ibujaidatun jatu yunuawen taea kene bunikabu caballoki katsaumetan jawa manama jawaida kainbaini buabun xanen ibujaidatun maewan kushipa Susa anu jabias yunuti jancha jatu banabimai jatuki chanidiabaunabu

¹⁵xanen ibutan sanpu tima tadi nanketapa inun juxupa sawea mane oro maiti jawendua sawea xanen ibun yabukuti tadi manyunepa tashi uxna duakabi peyabukukaini xanen ibujaidatun jiwe anua Mardoqueo taxnikainaya Susa anu jiweabun uintan benimajaidai sai sai ikubainaibun ¹⁶ja dikabi Judío nawabu jatun benima paewen uin juinti benimai ana dateama besibaunaibun ¹⁷janida provincia tibi inun mae tibi inun jiwebaunabu anu xanen ibujaidatun yunuti bei jikiabu yununikabun jatu banabimabuwen taea Judío nawabu benima chakayamai piti waxun pi besibaunaibun ja dikabi Judío nawabun jatu maematan jamapai shadabu jaya jatu mebintidubuwen taea jatuwen datei nawa betsa betsapabia: “Nun Judío nawaki”, ikubainibukiaki.

Jatuki sinataibu Judío nawabun jatu maemanibukiaki, na janchadan

9 ¹Uxe ¹²tian jawen kena Adar inun xaba ¹³tian xanen ibujaidatun yunuti jancha dabe jau anunbun Judío nawabuki sinataibun jatu maemakatsi ibiaibun jatu jaska wamama Judío nawabu jatuki sinataibu jatu maemanibukiaki. ²Provincia tibi janu xanen ibujaida Asuero jatu yunumis anu jabun jatu chakabuwakatsis ikaibu jatube detenamenun

ika mae tibi Judío nawabu jiwea anu ichabu yuda xukuabu tibi jatuwen datejaidakin jatu medabewakatsis ikaibuwen taea jadatuda jatu bedukubauntidubu ma mesea dakanibukiaki. ³⁻⁴Xanen ibujaidatun jiwe anu Mardoqueo xanen ibu bexmas ikunkaini xaba tibi yununikai kushipakunkainaya provincia tibi anu jakidi chaniakeakebaunaibu xanen ibu Mardoqueon kushipawen datekin maewan yununikabu tibi inun, provincia yununikabu tibi inun, provincia yununika bexmasbu tibi inun, Asueron xanen ibu bexmasbun Judío nawabu medabewakubainaibun ⁵jatuki sinataibu machatu chaipawen Judío nawabun jatuki sinataibu jatu detekubainkin jaska wakatsis ikin ma jatu yamawakin keyubaunaibun ⁶⁻¹⁰xanen ibujaidatun maewan Susa anuxun Judíobun 500 junibu tenantan jakia jatun mabu jawa meabuma ja dikabi Judío nawabuki sinatamis Amánen juni bakebu Parsandata inun, Dalfón inun, Aspata inun, Porata inun, Adalías inun, Aridata inun, Parmasta inun, Arisai inun, Aridai inun, Vaizata jati juni bakebu jatu tenankin keyudiabu ¹¹jabias xabatiandi jawen maewan Susa anu jati junibu tenankanxu Asuero banabimabu ninkatan ¹²Ester yuikin:

—Nenu Susa anua besti 500 junibu inun Amánen 10 juni bakebudi minabu Judío nawabun tenankanxukiaki. En provincia tibi janu en yunubaunmis anuxun jatida tenankanxuki. Midimajaidamenkain. Jakia ana jawa betsa en mia axuntidu min bechipaiai ea ana yuiwe. Jawada min ea yuai en mia axunxanaii— aka

¹³kemakin Esterin yuikin:

—Jaska pe min shinain jawen yunuti jancha chibankin jabias akanxu keska meshukidi Susa anuxun jabias watidubu min ea jatu yunuxuntiduki. Ja inun, dasibibun jau uinkubainunbun janu tenextidubu anu Amánen 10 juni bakebun yuda jatu duntanbainbainunbun min ea jatu amaxuntiduki— aka

¹⁴jaska Esterin ana yuixu xanen ibujaidatun jabias jatu yunua jawen yunuti jancha bena Susa anuxun jatu banabimabaunabu Amánen 10 juni bakebu tenanshinabu jatun yuda duntanibukiaki.

¹⁵Uxe Adartian inun 14 xabatian Susa anu jiweabu Judío nawabu ana ichaxun ana 300 junibu tenantan jakia jatun mabu jawa meabuma inibukiaki. ¹⁶⁻¹⁷Ja dikabi provincia betsa tibi anu jiweabu jatun jiwea mekei jabias uxe Adartian inun 13 xabatian Judío nawabu ichaxun jatuki sinataibu maemakin 75,000 yudabu tenantan jakia jatun mabu jawa bianma uxashini xaba 14tian juindukuin benimakin piti midima pewatan pi besiaibun

¹⁸janua Susa anu Judío nawabun xaba 13 inun xaba 14tian jatu tenanshinabuwen taea xaba 15tian juindukuin benimakin piti midima pewatan pi besidiaibun ¹⁹jakia mae jatiubuma inun mae kenekauana jayabuma anu Judío nawabu jiweabu uxe Adartian xaba

14tian benimakin piti midima pewatan pi besikin jatun jamapai inanananbukunibukiaki.

**Besi Purim año tibi jau akubainxanunbun
Mardoqueon jatu yununikiaki, na janchadan**

²⁰Jaska jatuki sinataibu Judío nawabun jatu maemashinabukidi Mardoqueon jawen kenenikabu unaki jatu kenematan janu Asueron yunubaunai anu provincia tibi inun xanen ibu benanta jiweabu inun chaima jiweabu jatu bumanikiaki, ²¹año tibi uxe Adartian xaba 14 inun xaba 15tian jau besikubainxanunbun jatu yunukinan. ²²Ja xaba dabetian jatuki sinataibu Judío nawabun jatu maemakin yamawatan jabias uxe punu nuka datei kaxa chakayamabiashinabu main bexteketan jabu benimakin besi taewabainibukiaki, ja xaba dabetian inanananbukunin ja dikabi nuitapaibu medabewakin jatu inain benimai Judío nawabu dasibi jau besikin pikubainxanunbun jawa jenetima wakinan. ²³Jatu yunukin Mardoqueon jatu kenexunima bechipaikin Judío nawabu dasibibun ja besitian jatun beya wakin ja chibanpaketi wanibukiaki.

²⁴Janua Judío nawabu dasibiki sinatakin Amánen jatu keyukin yamawakatsis ikin: “Jadatu uxe inun jadatu xaba pemenkain”, iwanan, mukayabubetan xau mexte númeroya jawen kena Purim putakin Judío nawabu jau tenankin keyuxanunbun jawen unanti Purimwen katuimabu ²⁵jakia Esterin xanen ibujaida yuia Judío nawabu jau yamawakin keyuxanunbun Amánen yunuti jancha chakabu kenexuntan jatu bumabaiama jakia jawen shinan chakabuwen Amánen chakabuwaimawen taexun janu tenexti anu Amán inun jawen juni bakebu duntankin jatu tenexnibukiaki. ²⁶Jaskawen taexun ja xabatian jatu maematan benimanibu shinankin janu besiti beya kenakin: “Purimki”, anibukiaki.

Mardoqueo bika tenei jiwekunkainkin jawada uinmawen taexun Mardoqueon kene uin: “Chanimaki”, ixun ²⁷jamebi inun jawenabu pakubainxanaibu inun Judíomabia jatun beya chibankin ibubis chani: “Nun Judío nawabuki”, ikubainaibu año tibi ja xaba dabetian anu jaska Mardoqueon jatu yusinma chibankin jawa jakimama Purim besiti beya jau akubainxanunbun Judío nawa xanen ibu dasibibun jatu yusinikiaki. ²⁸Judío nawabu dasibi inun jatunabu pai jiwekubainxanaibu jau jatun shinan jakimayamanunbadinunbun Judío nawabu xukuabu tibi inun, provincia tibi inun, maewan tibi anu jiwebaunabu pakubainkin jabias xaba dabetian shinain Purim besikubainmisbuki. ²⁹Januxun xanen ibujaidatun ain kayabi Abihailin bake Ester inun Judío nawa Mardoqueon besiti Purimkidi jancha kushipa mesewen ja dukun keneima jau chibanpakexanunbun ana ja kachu kenekin ³⁰⁻³²Judío nawabu dasibi inun jatunabu pakubainaibu jabias uxe inun xaba dabe Mardoqueo inun Esterin jatu yunuima anu Purim jau besikubainxanunbun unanuma

shinanmati jancha pepawen jatu yunutan jabatiandi kene betsa anu Purim besi taei juinti nishma kaxai samakekubaini keyutan benimakin pitidubu Esterin yunuti jancha jau chibankubainxanunbun jatu yunudiabu kenexunikabun jatu kenexunabu 127 provincia janu Asueron jatu yunubaunmis anu Judfo nawabu xukuabu tibi anu jatun kene jatu bumabu jaska Amán inun, Ester inun, Mardoqueon akubidanimi una anu xanen ibujaidatun kenexunikabun jatun miyui kenekin dasiwanibukiaki.

Mardoqueo xanen ibui pepakunkainikiaki, na janchadan

10 ¹Jatu jaska wakubainkin keyuabu badi betsatian yudabu xukuabu tibi mai inun jene natukan anu jiwebaunabun jau xanen ibujaida pei jati jau bixunkubainxanunbun xanen ibujaida Asueron manakuti impuesto bena jatu yununikiaki. ²Jaska yununika kushipa wakini Mardoqueo katuni inun jawen kushipawen dasibi Asueron akubaini jaska Media nawa xanen ibujaidabu inun jaska Persia nawa xanen ibujaidabun akubainmisbu una medan Asuerokidi miyui kenedianibukiaki. ³Xanen ibujaida Asuero ja kachu Judfo nawa Mardoqueo jabe xanen ibui mentsisipakunkainkin jakia jawenabu jau unanuma jiwununbun jatu yunukin pepas jatu benaxunkubainaiwen taexun jawenabu dasibibun Mardoqueo bechipajaidanibukiaki.